

Oqaasiliortut Ataatsimiinnerat
Tallimannngornermi apriliip 9-anni, marlung. maajip 11-anni aamma tall.
Maajip 14-anni 2010
Ilimmarfimmi Pujup allaffiani.

Peqataasut: Abia Abelsen, Eva Møller Thomassen aamma Carl Chr. Olsen.
Peqataaangitsut: Stephen Heilmann aamma Ellen J.Karlsen
Allatsi: Katti Frederiksen

Oqaluuserisassatut siunnersuutit:

1. Tikilluaqqusineq – siulittaasoq tikilluaqqusillunilu ilisimatitsivoq maajip 12-anni Inatsisartuni oqaatsit pillugit politikkipingajussaaneerpeqassasoq.
2. Kingullermik imaqaarniliap akuerineqarnera – akuerineqareerpoq.
3. Ilisimatitsissutit (Allagarsiussa) – Oqaasileriffimmi suliasat annikinngitsut, kiisalu sulianut ingerlareersut eqqarsaatigalugit tapertaalluni sulisussamik atorfinitsitsinissamik allagarsiussaqaartoqarpoq, aningaasalli aporfiuleriataarsinnaaneri apeqqutaallutik tamanna aalajangiunneqassaaq.
4. Nalunaarummi oqaatsit 2009-mi akuerisat – oqaatsit misissoqqinneqarlutik aaqqiissutissat kingullit suliarineqarput. (Ilaliussa 1 takuuk).
5. Animation 15.marts 2010 – ataatsimiinnerup tullissaani sammineqassaaq.
6. Antroposofi 26.marts 2010 – ataatsimiinnerup tullissaani sammineqassaaq.
7. Influenza virus H1(N1) 26.marts 2010 – Siornatigut influenza nualluummik taagorneqalereersaq tunngavigalugu nappaat imatut taaguuserneqarpoq:
Nualluut virus H1
8. Værdinormer aamma holdningsændringer 26.marts 2010 – Kalaallisut imatut taaneqarsinnaapput: **naleqartitat tunngavigisat** aamma **isummiutinik allannguinerit.**
9. Karriere aamma infrastruktur allallu 26.marts 2010 – karriere nassuiaaserneqassaaq **suliffimmi qaffakkiartormik.**

Infrastruktur ulluinnarni sumut atornerqarnera apeqqutaatillugu oqaasertalerniarneqartarpoq, ilaatigut attaveqaatit pineqartarlutik ilaatigullu aamma atortulersuutit pineqartarlutik, soorlu angallannermi ingerlatsineq eqqarsaatigalugu. Oqaatsilli taassuma infrastrukturip imarisaa tamakkiisoq eqqarsaatigalugu kalaallisut ima taaguuserneqarnissaa Oqaasiliortut aalajangiuppaat: **attaveqaatit atortulersuutillu.**

Oqarasuaatit normuisa kisitsisinik taaneqarsinnaannginnerinut tunngavilersuut tassaavoq kisitsit aamma normut isumaasa assigiinnginnerat.

Kisitsisit tassaapput 1-miit tulleriiaaqqissaarlugit inissitsitikkat 1-2-3-4-5-6 il.il., kisiannili normut tassaasinnaallutik kisitsit imaluunniit taakkua assigiinngitsunik tulleriinnilersorneri sumut aalajangersimasunut attuumatinneqartut.

10. Oqaaseq 'ataani' 28.marts 2010 – ullumikkut oqaatsip atorneqarnera siammasimmat Oqaasiliortut isumaqarput aalajangersimasumuinnaq kisiat atugaanissaanut killilerneqarsinnaanngitsoq (soorlu nerriviup ataani), tassami suut assigiinngitsut iluini aaqqissugaaneq eqqarsaatigineqartillugu nassuiaanermi pinngitsoorneqarsinnaajunnaarnikummat, ass. *SIK-p ataani isumaqatigiissutit imalt. namminersornerullutik oqartussat kommunillu ataanni pisortat ingerlatsiviini suliffiini...*

Ilanngullugu erseqqissaatigineqassaaq oqaatsit atuuffii, ineriartorneq aamma ilutigalugu, allanngorsinnaasarnerat oqaatsitta pisuunnguutigiinnartaraat.

11. -miu imalt. -mioq 28.marts 2010

Oqaasiliortut isumaqarput suna arlaat aalajangersimaqqissaartoq aatsaat pineqaraangat –mioq atorneqartartoq, kisiannimi aamma ilaatigut –miu aamma –mioq paarlaguussorlugit immikkoorsinnagit atorneqartarlutik, assersuutigalugu oqaatsini allani makkunani aamma atorneqartarluni erni aamma erneq, anaana anaanaq il.il.

12. Oqaatsivut pillugit 28.marts 2010

Saaffiginnittup isornartorsiutaa ilu Moornerarneqaannassaaq, tassa ilaanni tusagassiutini oqaatsit atorneqartut paatsuungatitsisinnaasarmata. Uanili assersuutigisaani malunnarpoq isumammik allanngortitsineraaneq eqqortortaqarlunilu aamma ilaatigut oqaatsit ineriartornerisa kinguneriinnarsimasinnaalluaraat, tassami oqaaseqatigiinni paatsoortitsissut unaagunarmat **isumaqarpoq**, oqaaseqatigiilli ingerlaqqinnerini oqaaseq atorneqartooq imaalerluni *isumaqanngilaq*.

Saaffiginnittup imaattussaasorigunarpaa 'XX kisimiunngilaq taamatut isumaqartoq', kisiannili oqaaseqatigiit atalernermikkut isummamik ersersitsinerat paatsoornartoqanngikkaluarpoq, assersuutit taamaattut allat makkuupput: kalaallit tamarmik qajartorneq ajorpoq, imatut paasisariaalluni: kalaallit ilaat qajartorneq ajorput imalt. Amerikamiut tamarmik pualasuunngillat, imatut paasineqartussaq Amerikamiut ilaat pualasuunngitsut.

13. Qasseersiutitut taaguutillit 29.marts 2010 – akissusiuunneqareerpoq, pisari-aqassappalli erseqqissaneqassaaq taaguutit qasseersiutaasut oqaaseqatigiinni atuuffimmini qanoq inissisimani isumaqarnerilu apeqqutaallutik oqaluutaat ataasersiutinngortinneqarlutilluunniit qasseersiutinngortinneqartaramik.

14. Titarneq uingasoq imalt.tukingasoq? 8.april 2010 – Saaffiginnissut Oqaasiliortunit tigulluarneqarpoq, ilanngullugillu siunnersuutit killiffilersuinnermut tunngasut allanngortinnagit akuerineqarlutik:

/ **titarneq sikingasoq** aamma \ **titarneq qivingasoq**.

Ilanngullugu aamma qallunaatut understreg kalaallisut oqaasertalerneqarpoq ima: **kittoraat alleq**, tassani taaguut kittoraat sungiusimaneqarluni atorneqareersoq atuinnarlugu. Ataatigut titarnermik taaguusinnginneranut patsisaavoq allatat ataatigut titarneqarnissaannik paatsoortitsisinnaannginnissaa.

15. Nukissiorfimmiit atorfiit taaguutaasa kalaallisuunngortinneri – ilaliussaq 2 takuuk.

Atorfinnut taaguutit pineqartut katillugit 79-it kiisalu sumiissusersiornermut allagartat 36-it misissorneqarlutik, naqqissorneqarlutik ilaatigullu nutaanik taaguutinik Oqaasiliortunit siunnersuusiorfigineqarlutik suliarineqarput.

Nassiussarineqartunit allannguutissatut aalajangiunneqartut ilaliussami takuneqarsinnaapput, ilaatigut oqaaseq ‘qullersaq’ pisortamik taarserneqarpoq, tamatumunngalu patsisaavoq taaguutinik atuinissamik suliaqarnermi sumi tamani atuuttussamik assigiissaariniarneq.

Allannguut alla tassaavoq ‘sekretariat’, taanna allattoqarfimmik taaniarneqartartoq *allatseqarfimmik* taaguuteqarnissaa Oqaasiliortunit siornatigut aalajangiunneqareerpoq, tamatumunnga patsisaalluni ‘administration’ kalaallisut allattoqarfimmik taaguuserneqareersimammat.

Taaguutitut nutaatut isigisariaqartoq tassaavoq assistent, siusinnerusukkut ikiortimik taagorneqartartoq. Oqaasiliortut ataatsimiinnerminni aalajangiiffigaat ima taagorneqalissasoq: **sullissisoq**, tassani erseqqissarniarlugu assistentit ikiortituinnaq pinnatik allanik aamma suliaassarpassuaqartarmata.

Nukissiorfiit qinnuigineqarpoq atorfiit taaguutaannut siunnersuutit atorfiit imarisaannut tulluunnersut qimerloorluaqqularlugit, taamaasilluta eqqortumik taaguusiisimaneq qulakkeerneqarsinnaanerussammat.

16. Nappaat borderline 13.april 2010

Nappaat siornatigut assigiinngitsunik taagorneqartarpoq (eqqarsartaatsimikkut borderlinemik nappaat, misigissutsikkut killissanik aqutsisinnaanani innarluuteqarneq il.il.), ilaatigulli aamma kalaallisut immikkut taaguuteqartinniannikkaluarlugu nassuiaataasumik ilaliinnarneqartarsimalluni. Oqaasiliortut isumaqarput **ularussinermik innarluuteqarneq/nappaateqarneq** taassumunnga nappaammut taaguutigitissallugu tulluartuusoq.

17. Operativ 15.april 2010

Taaguummi politiit pineqarmata oqaaseq **periartaarsinnaasut** Oqaasiliortunit atoqquneqarpoq, oqaatsip taassuma iluanereermata suligasuartussaallutillu piareersimasussat, kiisalu sillimasuullutik nikeriataarsinnaasut.

18. Inuit**ter** 15.april 2010

Qallunaap Philip Lauritzenip oqaaseq inutter atoqqaarmagu, danskillu oqaaseq oqaatsiminnut ikkunnialermassuk kalaallinit ippigineqaqqaarsimavoq Dansk Sprognævni nullu saaffiginnissutaalluni, taamaakkalu artorli qallunaat oqaatsimik atueriaasiattut akuerineqartoq Dansk Sprognævni mit aalajangiunneqarpoq; oqaasersiat allat assigalugit danskit oqaasiinut tullu artunngorsaannarlugu, soorluttaaq aamma uagut kalaallisut oqaatsitsinni oqaasersianik taamatut atuisartugut, ass.: danske**q** = dansker, danskere = danskit il.il. Uani qujassutigineqaannassaaq taaguut eskimo, 1977-imi ICC-p atorunnaarsitaa, danskinit atorneqarunnaarluni Inuit, -ten, -ter atorneqartalermat.

19. Opret brugerkonto 20.april 2010

Brugerkonto ima taaguuserneqarpoq: **atuisutut konto**
Opret brugerkonto: **atuisutut kontotaarit**

20. Virtuelle kalaallisut 29.april 2010

Virtuellemut tunngatillugu kalaallisut **piviusungatitaaq** atorneqalerpoq.

21. KNR-imit saaffiginnissutit 4.maj 2010

Demokrati – **inuinnaat naalakkersueqataanerit**
Ytringsfrihed – **isummersinnaanermik pisinnaatitaaffik**
Magtens tredeling – **oqartussaaffiit pingasunut immikkoortiternerat**
Kommerciel direktør – **niuernermik ingerlatsinermi pisortaaq**
Meditation – **toqqissilluni imminut naalaarneq**

22. Allat

a) Oqaasiliortut qanoq piginnaaneqartitaappat aammalu saneqquppa aamma paarlappaa, taakkualu assigiinngissutaat.

Siullermik oqaatigineqassaaq Oqaasileriffiup nittartagaani Oqaasiliortut suliaasaqarfii ersarissumik allaqqammata. Nittartakkatsinnullu tunngasumik siunnersuusiai (oqallittarfik aammalu apeqqutit akissutaanullu tunngasut) suleqatigiinnut ingerlateqqinneqarumaarput.

Oqaatsit assigiinngitsunik isumallit paarlaguussorneqartalersimanagerannut tunngasumik saaffiginnissutaa radiukkoorunneqarumaarpoq, kisiannili tamakkua kukkunerit paatsoonerilluunniit ullutsinni tusarnartaanngillat, nassuiaassutigineqartarnerisigulli aatsaat aqqiivigineqarsinnaasut.

Saneqquppa, isumaa tassa suna arlaat uninngasoq tungaanukariarluni uniffiginngivillugu saniatigoorluni ingerlaneq.

Paarlappaa, assigiinngitsunik isumaqarpoq, uanili isumaa tassa sammivinniit assigiinngitsuniit illugit (inuusinnaapput biliusinnaallutilluunniit) imminnut ilaatigut sianiginngisaminnik naapikkiartoriarlutik qaangiinnartut.

Naapippaa, isumaa tassaavoq kina arlaat inuk takusaq uniffigaa.

b) Atorfiit taaguutaanni naqinnerit angisuumik mikisumilluunniit aallartittassarnersut eqqartorneqarpoq aalajangiussinertaqanngitsumik. Tamatumunnga apeqqut misissorneqaqqaariarluni kingusinnerusukkut isummerfigineqaqqikkumaarpoq.

Inussiarnersumik inuullaqqusilluta
Carl Chr. Olsen
Siulittaasoq

Katti Frederiksen
allatsi